

KOS ES LES

Kos Es Les, Zaj 1, 2 thiab 3

Cov lus qhib phau ntawv :
txhua tsav txhua yam txawj yaj
ntshis. 1 : 1 - 11.

1 1 Phau ntawv no yog cov lus Kos Es Les xav. Kos Es Les yog Das Vis tus tub. Das Vis ua vaj nyob Yes Lus Xas Les.

2 Kos Es Les hais tias :
"Txhua yam txawj yaj ntshis, yog zoo li ib co pa yuav yaj mus."

3 Tib neeg nyob hauv lub qab hnub, tib neeg khwv khwv ua luaj, neeg tau tus qab hau dab tsi ?

4 Ib tiam dhau lawm, lwm tiam tuaj. Lub ntiaj teb nyob li qhov qub.

5 Lub hnub tawm tuaj, lub hnub poob qho, nws ho mus tawm rau lwm qhov.

6 Cua tuaj naj fab tuaj, cua tshuab mus lawm pej fab, cua kiv thiab kiv, cua rov qab mus txog qhov chaw qub uas nws tuaj. 7 Tus dej twg kuj ntws mus hauv hiav txwv, tab sis lub hiav txwv tsis txawj puv, cov dej kuj ntws tas zog mus rau qhov qub.

8 Tas puas tsav yam ceeb laj ua ub ua no, tib neeg piav tsis tau. Qhov muag ntsia ntsoov, los qhov muag tseem ntsia tsis txaus nws siab. Pob ntseg mloog ntsoov los yeej mloog tsis pov khawv.

9 Qhov twb muaj lawm tseem yuav muaj dua tuaj. Qhov twb ua lawm tseem yuav ua ntxiv. Tsis muaj ib yam tshiab nyob hauv lub qab ntuj no.

10 Muaj tej yam uas yus hais tias :
"Qhov no yog ib qho tshiab !" Tab sis yam ntawd twb muaj tau ntaw tiam ua ntej lawm. 11 Yus tsis nco txog thaum ub lawm, thiab lwm hnub luag yuav tsis nco txog nyem no.

Kev iab kev khwv yog yaj ntshis.
2 : 21 - 23.

2 21 Ntsia tus neeg no : nws tau khwv ua hauj lwm, nws thoob tsib thiab paub txuj, tab sis nws yuav tsum tso tej yam ntawd tseg rau lwm tus khaws xyeem yuav. Li ntawd nws cov hauj lwm kuj txawj yaj ntshis, yog ib yam xwv txheej loj.

22 Tib neeg tau ua hauj lwm hnyav hnyav, nws lub siab siv zog nrhiav ub nrhiav no, nws txoj kev khwv nyob hauv lub qab hnub, tau tus qab hau dab tsi ?

23 Nws niaj hnub txom nyem, nws niaj hmo tu siab, nws lub siab tsis tau kev so. Tej ntawd kuj yog yaj ntshis thiab.

Peb tej hauj lwm mus tshwm rau qhov twg ? 3 : 1 - 11.

3 1 Nyob hauv lub qab ntuj no, muaj ib lub sij hawm cia ua tas puas tsav yam, muaj ib lub caij cia ua tas puas tsav yam.

2 Muaj ib lub caij yug los, thiab ib lub caij tuag, muaj ib lub caij cog, ib lub caij rho yub.

3 Muaj ib lub caij tua, thiab ib lub caij kho kom zoo,

muaj ib lub caij rhuav, ib lub caij txhim.

4 Muaj ib lub caij quaj, ib lub caij luag, muaj ib lub caij ntsaj, ib lub caij dia.

5 Muaj ib lub caij txawb pob zeb, ib lub caij khaws pob zeb.

Muaj ib lub caij sib puag, ib lub caij tsis txhob sib puag.

6 Muaj ib lub caij nrhiav, ib lub caij ploj, muaj ib lub caij muab khaws cia, ib lub caij muab pov tseg.

7 Muaj ib lub caij dua ntaub, ib lub caij xaws ntaub, muaj ib lub caij nyob twj ywm, ib lub caij hais lus.

8 Muaj ib lub caij nyiam, ib lub caij ntxub.

Muaj ib lub caij ua rog, ib lub caij thaj yeeb.

9 Tab txawm khwv npaum twg mas yus tau tus qab hau dab tsi ? 10 Kuv pom txoj hauj lwm Tswv Ntuj muab rau tib neeg cov tub ua. 11 Tswv Ntuj tau ua txhua Yam kom dhos rau lub sij hawm. Tswv Ntuj muab ib lub siab txawj ntsuas lub sij hawm rau tib neeg. Tab sis tib neeg xav txog tej sij hawm tiام dhaum tiام mas tib neeg tsis to taub tias Tswv Ntuj ua dab tsi txij thaum lub hauv paus mus txog hnub kawg.

Yuav nco txog Tswv Ntuj txij thaum hluas mus tas ib sim neej.

11 : 9 - 10 + 12 : 1 - 8.

11 9 Me hluas, koj yuav xyiv fab rau lub caij hluas. Koj yuav ua lub siab kaj lug thaum koj tseem hluas. Koj mus qhov chaw koj lub siab pus koj mus, mus qhov chaw koj qhov muag ntsia. Tab sis koj yuav tsum paub tias Tswv Ntuj yuav txiat txim rau koj txog tej ntawd tib si. 10 Koj muab kev tu siab tshem mus deb ntawm koj, koj tshem kev mob mus deb ntawm koj cev nqaij, vim lub caij hluas thiab lub caij nplooj hlav txawj yaj ntshis mus.

12 1 Thaum koj hluas, koj yuav nco txog tus tsim koj. Thaum tseem tsis tau muaj tej hnub koj raug xwv txheej, thiab thaum tsis tau txog cov

xyoo uas koj hais tias :

"Tej ntawd tsis zoo dab tsi rau kuv !"

Mas koj xub nco txog tus tsim koj mog ! 2 Thaum lub hnub, lub hli, cov hnub qub thiab qhov pom kev tseem tsis tau tsaus, thaum ntuj los nag tas huab tseem tsis tau sawv, koj yuav xub nco txog tus tsim koj mog ! 3 Thaum tseem tsis tau txog lub caij uas cov zov tsev tshee, tsis tau txog lub caij cov txiv neej cus plaws khoov. Thaum tsis tau txog lub caij cov poj niam zom zeb tsawg zuj zus, cov ntsia ntawm qhov rais pom tsis meej, 4 thiab lawv kaw cov qhov rooj qhib ncaj txoj kev, mas koj xub nco txog tus tsim koj mog !

Thaum tseem tsis tau txog lub caij lub zeb zom ntsiag zuj zus, thaum yus tsim dheev vim me noog quaj, thaum cov ntxhais nkauj xwb lub suab kwv txhiaj ntsiag tsis tau tu qab, koj yuav nco txog tus tsim koj. 5 Thaum tseem tsis tau ntshai kev nce toj, tseem tsis tau txhawj ntawm ib tog kev, thaum me kooj tshuab tsis tau tshaib, mas koj xub nco txog tus tsim koj mog !

Thaum tib neeg tseem tsis tau nrhiav qhov chaw zwm av mus li, thaum cov neeg nyiav tseem tsis tau sawv los nyiav.

6 Thaum txoj xov nyiaj tseem tsis tau tu, lub ntim kub tseem tsis tau tawg, lub hub ce dej hauv qhov dej tsis tau ntaij, txoj hlua tseem tsis tau plam saum lub log hlua rub dej, mas koj xub nco txog tus tsim koj mog !

7 Thaum av luaj tseem tsis tau rov mus ua av, thaum txoj pa tseem tsis tau rov mus cuag tus Tswv Ntuj uas pub txoj pa, mas koj xub nco txog tus tsim koj mog !

8 Kos Es Les hais tias :

"Tas puas tsav yam txawj yaj ntshis, yog zoo li ib co pa yaj ntshis mus."